

- 1<sup>r</sup> Das best / am dantzen / ist das man
- 2<sup>r</sup> Nit yemerdar düt für sich gan
- 3<sup>r</sup> Vnd ouch by zyt vmb keren kan



## Von dantzen

- 1 Jch hieltt nah die für narren gantz
- 2 Die freüd vnd lust hant jn dem dantz
- 3 Vnd louffen vmb / als werens toub
- 4 Müd füß zü machen jnn dem stoub

5 Aber so ich gedenck dar by  
 6 Wie dantz / mit sünd entsprungen sy  
 7 Vnd ich kan mercken / vnd betracht  
 8 Das es der tüfel hat vff bracht  
 9 Do er das gulden kalb erdacht  
 10 Vnd schüff das gott wart gantz veracht /  
 11 Noch vil er mit zů wegen bringt  
 12 Vß dantzen vil vnratts entspringt  
 13 Do ist hochfart / vnd üppikeyt  
 14 Vnd furlouff der vnlutterkeyt  
 15 Do schleyfft man Venus by der hend  
 16 Do hatt all erberkeyt eyn end  
 17 So weys ich gantz vff erterich  
 18 Keyn schympf der sy eym ernst so glich  
 19 Als das man dantzen hat erdocht  
 20 Vff kilwih / erste meß ouch brocht  
 21 Do dantzen pfaffen / münch / vnd leyen  
 22 Die kutt muß sich do hynden reyen  
 23 Do loufft man / vnd würfft vmbher eyn  
 24 Das man hoch siecht die blossen beyen  
 25 Jch will der ander schand geschwigen  
 26 Der dantz schmekt bas dann essen fygen  
 27 Wann Küntz mit Mätzen dantzen mag  
 28 Jnn hungert nit eyn gantzen tag  
 29 So werden sie des kouffes eyns  
 30 Wie man eyn bock geb vmb eyn geiß  
 31 Soll das eyn kurtzwil syn genant  
 32 So hab ich narrheyt vil erkant  
 33 Vil wartten vff den dantz lang zytt  
 34 Die doch der dantz ersettigt nit

*k iiij*

---

20 kilwih GW5046 GW5047 ] kilchwih GW5041 29 eyns GW5046 GW5047 ] eys GW5041